

Agihan kekayaan adil: PM

Oleh WAN HAMIDI
HAMID

KUALA LUMPUR, Jumaat — Tidak ada kaum di negara ini yang patut berasa diri mereka diketepikan dalam pembahagian kekayaan, kata Datuk Seri Dr Mahathir Mohamad. “Sehubungan itu, Perdana Menteri berkata, mana-mana kaum di negara ini tidak patut menimbulkan soal kerajaan tidak berlaku adil atau mereka berasa diketepikan di segi ekonomi.

“Kerajaan Barisan Nasional (BN) menentukan semua kaum akan menikmati faedah daripada pembangunan. Untuk ini pembahagian ekonomi sedia ada yang mencukupi untuk semua kaum akan diagihkan dengan saksama,” katanya.

Berucap merasmikan Perhimpunan Agung MIC ke-36 di sini malam ini, Perdana Menteri berkata, soal penting ialah semua pihak perlu mengekalkan kestabilan politik dan perpaduan supaya pertumbuhan ekonomi dapat dikembangkan.

“Jika kestabilan dan perpaduan kaum terganggu, sukar bagi negara mencapai pertumbuhan. Tanpa pertumbuhan, semua kaum tidak akan dapat menikmati faedah,” katanya.

Datuk Seri Dr Mahathir mengakui kemiskinan masih wujud walaupun kerajaan berjaya menurunkan peratus kemiskinan di negara ini.

Bagaimanapun, katanya, kemiskinan itu tidak terhad kepada satu kaum saja tetapi merangkumi Melayu, Cina, India, Iban, Kadazan dan kaum lain yang masih miskin.

“Dalam hal ini, penekanan akan diberi untuk membasmi kemiskinan yang masih wu-

jud. Perlu ditegaskan dalam jangka Rancangan Jangka Panjang Kedua (RRJP2), kerajaan akan memberi tumpuan terhadap membasmi kemiskinan tanpa mengira kaum,” katanya.

Menurut Perdana Menteri, kerajaan juga akan memberi perhatian kepada keperluan masyarakat lain dalam usaha menyusun semula masyarakat.

Datuk Seri Dr Mahathir berkata, negara juga mengamalkan sistem ekonomi bebas yang memberi peluang semua kaum memperbaiki diri sendiri.

“Kerajaan menyediakan peluang yang luas untuk rakyat yang mempunyai inisiatif,

sanggup bekerja keras dan mempunyai semangat keusahawanan untuk memajukan diri,” katanva.

Sehubungan itu, Perdana Menteri berkata, rakyat perlu berwaspada supaya tidak terperangkap dengan dakyah pembangkang yang sering menimbulkan isu kononnya kerajaan tidak berlaku adil kepada semua kaum.

Menurutnya, dakyah pembangkang turut menyebabkan ada kalangan masyarakat India sendiri terpengaruh dengan dakwaan mereka (kaum India) tidak memperolehi bahagian dalam ekonomi negara.

“Sebenarnya kerajaan BN sudah berlaku adil kepada semua kaum sehingga mereka menikmati faedah daripada dasar pembangunan kerajaan.

“Hanya BN dapat menjamin masa depan masyarakat India di negara ini. BN adalah parti yang dapat menjaga kepentingan semua kaum, termasuk masyarakat India dan ini sudah terbukti pada masa lalu,” katanya.

Datuk Seri Dr Mahathir berkata, adalah penting bagi masyarakat India terus memberi sokongan kepada BN dan tidak terpengaruh dengan taktik parti lawan yang sentiasa menimbulkan perasaan tidak puas hati di kalangan rakyat.

Katanya, tanggungjawab utama rakyat ialah menjadikan Malaysia sebuah negara yang lebih maju, aman dan makmur.

Bagi mencapai matlamat itu, Perdana Menteri berkata, rakyat tidak boleh membuang masa dengan isu remeh-temeh yang boleh menghalang tumpuan kepada usaha positif untuk menjayakan matlamat negara.